

博物志

CHI  
1140

財

財

財

一

一

博物志



光緒紀元夏月湖  
北崇文書局開雕

博物志敘

史稱張華讀書三十車作博物志四百武帝以爲繁存十卷今  
讀其書雖多奇聞異事而簡略不成大觀豈書傳旣久殘闕處  
多耶抑或繁非能博博不在繁耶辨龍鮓識劍氣定有一段不  
經人見之學問附於書以傳一讀再讀令人悔武帝之芟除而  
思有以覩其全也錢塘唐琳玉林父識

此詩見於全世錄

卷之六

卷之五

—

博物志目錄

卷一

地理略自魏氏曰已前夏禹治四方而制之

地

山

水

山水總論

五方人氏

物產

卷二

外國

異人

異俗

異產

卷三

異獸

異鳥

異蟲

異魚

異草木

卷四

物性

物理

物類



藥物

藥論

食忌

藥術

戲術

卷五

方士

服食

辯方士

卷六

人名攷

文籍攷

地理攷

典攷

樂攷

服飾攷

器名攷

物名攷

卷七

異聞

卷八

史補

卷九

雜說上

卷十

雜說下

目錄終

博物志卷一

晉 張華撰

余視山海經及禹貢爾雅說文地志雖曰悉備各有所不載者作略說出所不見竊言遠方陳山川位象吉凶有徵諸國境界犬牙相入春秋之後並相侵伐其土地不可具詳其山川地澤略而言之正國十二博物之士一覽而鑒焉

地理略自魏氏曰已前夏禹治四方而制之

河圖括地象曰地南北三億三萬五千五百里地部之位起形高大者有崑崙山廣萬里高萬一千里神物之所生聖人仙人之所集也出五色雲氣五色流水其泉南流入中國名曰河也其山中應於天最居中八十城布繞之中國東南隅居其一分是奸城也

中國之域左濱海右通流沙而言之萬五千里東至蓬萊西至隴右右跨京北前及衡岳堯舜土萬里三代時七千里亦無常隨德劣優也

堯別九州舜爲十二

秦前有藍田之鎮後有胡宛之塞左崤函右隴蜀西通流沙險阻之國也

蜀漢之士與秦同域南跨邛笮北阻褒斜西卽隄礙隔以劍閣窮險極峻獨守之國也

周在中樞西阻崤谷東望荆川南面少室北有太嶽三河之分雷風所起四險之國也

魏前枕黃河背漳水瞻王屋望梁山有藍田之寶浮池之淵

趙東臨九州西瞻恒嶽有沃渚之流飛壺井陘之險至於潁陽

涿鹿之野

燕卻背沙漠進臨易水西至君都東至於遼長蛇帶塞險陸相乘也

齊南有長城巨防陽關之險北有河濟足以爲固越海而東通於九夷西界岱嶽配林之險坂固之國也

魯前有淮水後有岱嶽蒙羽之向洙泗之流大野廣土曲阜

宋北有泗水南迄睢邗有孟諸之澤碭山之塞也

楚後背方城前及衡嶽左則彭蠡右則九嶷有江漢之流實險阻之國也

南越之國與楚爲鄰五嶺已前至於南海負海之邦交趾之土謂之南裔

吳左洞庭右彭蠡後濱長江南至豫章水戎險阻之國也

東越通海處南北尾間之間三江流入南海通東治山高海深險絕之國也

衛南跨於河北得淇水南過漢上左通魯澤右指黎山

贊曰

地理廣大四海八方遐遠別域略以難詳侯王設險守固保疆遠遮川塞近備城隍司察奸非禁禦不良勿恃危阨恣其淫荒無德則敗有德則昌安屋猶懼乃可不忘進用忠直社稷永康教民以孝舜化以彰

地

天地初不足故女媧氏練五色石以補其闕斷鼈足以立四極其後共工氏與顓頊爭帝而怒觸不周之山折天柱絕地維故



天後傾西北日月星辰就焉地不滿東南故百川水注焉  
崑崙山北地轉下三千六百里有八元幽都方二十萬里地下  
有四柱四柱廣十萬里地有三千六百軸犬牙相奉  
泰山一曰天孫言爲天帝孫也主召人魂魄東方萬物始成知  
人生命之長短

考靈耀曰地有四遊冬至地上北而西二萬里夏至地下南而  
東三萬里春秋二分其中矣地常動不止譬如人在舟而坐舟  
行而人不覺七戎六蠻九夷八狄形類不同而總謂之四海言  
皆近海海之言晦昏無所覩也  
地以名山爲輔佐石爲之骨川爲之脉草木爲之毛土爲之肉  
三尺以上爲冀三尺以下爲地

山

五嶽華岱恒衡嵩

按北太行山而北去不知山所限極處亦如東海不知所窮盡也

石者金之根甲石流精以生水水生木木含火

水

漠北廣遠中國人眇有至北海者漢使驃騎將軍霍去病北伐單于至瀚海而還有北海明矣

周日用曰余聞北海蘇武牧羊之所去年德甚邇祗一池號

北海蘇武牧羊常在於是耳此地見有蘇武湖非北海之海

漢使張騫渡西海至大秦西海之濱有小崑崙高萬仞方八百里東海廣漫未聞有渡者

南海短狹未及西南夷以窮斷今渡南海至交趾者不絕也

史記封禪書云威宣燕昭遣人乘舟入海有蓬萊方丈瀛州三

神山神人所集欲採仙藥蓋言先有至之者其鳥獸皆白金銀爲宮闕悉在渤海中去人不遠

四瀆河出崑崙墟江出岷山濟出王屋淮出桐柏

八流亦出名山渭出鳥鼠漢出嶓冢洛出熊耳涇出少室汝出燕泉泗出陪尾沔出月台沃出太山水有五色有濁有清汝南有黃水華山有黑水沔水淵或生明珠而岸不枯山澤通氣以興雷雲氣觸石膚寸而合不崇朝以雨

江河水亦名曰泣血道路涉骸於河以處也

### 山水總論

五嶽視三公四瀆視諸侯諸侯賞封內名山者通靈助化位相亞也故地動臣叛名山崩王道訖川竭神去國隨已亡海投九仞之魚流水涸國之大誠也澤浮舟川水溢臣盛君衰百川沸

騰山冢峯崩高岸爲谷深谷爲陵小人握命君子陵遲白黑不別大亂之徵也

援神契曰五嶽之神聖四瀆之精仁河者水之伯上應天漢太山天帝孫也主召人魂東方萬物始成故知人生命之長短

### 五方人民

東方少陽日月所出山谷清其人佼好

西方少陰日月所入其土窮冥其人高鼻深目多毛

南方太陽土下水淺其人大口多傲

北方太陰土平廣深其人廣面縮頸

中央四析風雨交山谷峻其人端正

東南之人食水產西北之人食陸畜食水產者龜蛤螺蚌以爲珍味不覺其腥臊也食陸畜者狸兔鼠雀以爲珍味不覺其膾

也

和氣相感則生朱草山出象車澤出神馬陵出黑丹阜出土怪  
有山者採有水者漁山氣多男澤氣多女平衍氣仁高陵氣犯  
叢林氣撻故擇其所居在高中之平下中之高則產好人  
居無近絕溪羣冢狐蠱之所近此則死氣陰匿之處也

山居之民多癭腫疾由於飲泉之不流者今荆南諸山郡東多  
此疾瘰癧山踐土之無鹵者今江外諸山縣偏多此病也

盧氏曰不然也

在山南人有之北人及吳楚無此病蓋南出黑  
水水土然也如是不流泉井界尤無此病也

### 物產

地性含水土山泉者引地氣也山有沙者生金有穀者生玉名  
山生神芝不死之草上芝爲車馬中芝爲人形下芝爲六畜土  
山多雲鐵山多石五土所宜黃白宜種禾黑墳宜麥黍蒼赤宜

穀芋下泉宜稻得其宜則利百倍

江南大貝海出明珠仁主壽昌民延壽命天下太平

名山大川孔穴相內和氣所出則生石脂玉膏食之不死神龍  
靈龜行於穴中矣

神宮在高石沼中有神人多麒麟琪芝神草有英泉飲之服三  
百歲乃覺不死去瑯琊四萬五千里

三珠樹生赤水之上

員丘山上有不死樹食之乃壽有赤泉飲之不老多大蛇爲人  
害不得居也

博物志卷二

外國

夷海內西北有軒轅國在窮山之際其不壽者八百歲渚沃之野鸞白舞民食鳳卵飲甘露

白民國有乘黃狀如狐背上有角乘之壽三千歲

君子國人衣冠帶劍使兩虎民衣野絲好禮讓不爭土千里多薰華之草民多疾風氣故人不蓄息好讓故爲君子國

三苗國昔唐堯以天下讓於虞三苗之民非之帝殺有苗之民叛浮入南海爲三苗國

驩兜國其民盡似仙人帝堯司徒驩兜民常捕海島中人面鳥口去南國萬六千里盡似仙人也

大人國其人孕三十六年生子頭其兒則長大能乘雲而不能

走蓋龍類去會稽四萬六千里

脈光國民光出口中形盡似狻猴黑色

結胃國有滅蒙鳥奇肱民善爲扞扞以殺百禽能爲飛車從風遠行湯時西風至吹其車至豫州湯破其車不以視民十年東風至乃復作車遣返而其國去玉門關四萬里

羽民國民有翼飛不遠多鸞鳥民食其卵去九疑四萬三千里穿胃國昔禹平天下會諸侯會稽之野防風氏後到殺之夏德之盛二龍降之禹使范成光御之行域外既周而還至南海經防風防風氏之二臣以塗山之戮見禹使怒而射之迅風雷雨二龍昇去二臣恐以刃自貫其心而死禹哀之乃拔其刃療以不死之草是爲穿胃民

交趾民在穿胃東



孟舒國民人首鳥身其先主爲霄氏訓百禽夏后之世始食卵  
孟舒去之鳳凰隨焉

異人

河圖玉版云龍伯國人長三十丈生萬八千歲而死大秦國人  
長十丈中秦國人長一丈臨洮人長三丈五尺

禹致宰臣於會稽防風氏後至戮而殺之其骨專車長狄喬如  
身橫九畝長五丈四尺或長十丈

秦始皇二十六年有大人十二見於臨洮長五丈足迹六尺東  
海之外大荒之中有大人國僬僥氏長三丈時含神霧

日東北極人長九丈

東方有螭螂沃焦防風氏長三丈短人處九寸遠夷之名雕題  
黑齒穿胸脰耳天竺歧首

子利國人一手二足拳反曲

無臂民居穴食土無男女死埋之其心不朽百年還化爲人細民其肝不朽百年而化爲人皆穴居處二國同類也

蒙雙民昔高陽氏有同產而爲夫婦帝放之北野相抱而死神鳥以不死草覆之七年男女皆活同頸二頭四手是蒙雙民

有一國亦在海中純女無男又說得一布衣從海浮出其身如中國人衣兩袖長二丈又得一破船隨波出在海岸邊有一人項中復有面生得與語不相通不食而死其地皆在沃沮東大海中

南海外有鮫人水居如魚不廢織績其眼能泣珠

嘔絲之野有女子方跪據樹而嘔絲北海外也

江陵有猛人能化爲虎俗又曰虎化爲人好著紫葛人足無踵

曰南有野女羣行見丈夫狀晶目裸袒無衣襜

異俗

越之東有駭沐之國其長子生則解而食之謂之宜弟父死則負其母而棄之言鬼妻不可與同居周日用曰既其母爲鬼妻則其子爲鬼子亦合棄之矣

楚之南有炎人之國其親戚死朽之肉而棄之然後埋其骨乃爲孝也

秦之西有義渠國其親戚死聚柴積而焚之熏之卽煙上謂之登遐然後爲孝此上以爲政下以爲俗中國未足爲非也此事

見墨子

周日用曰此事庶幾佛國之法月如是乎中國之徒亦如此也

荊州極西南界至蜀諸民曰獠子婦人妊娠七月而產臨水生兒便置水中浮則取養之沈便棄之然千百多浮旣長皆拔去

上齒牙各一以爲身飾

母王儉遣王頎追高句麗王宮盡沃沮東界問其耆老言國人常乘船捕魚遭風吹數十日東得一島上有人言語不相曉其俗常以七夕取童女沈海

交州夷名曰俚子俚子弓長數尺箭長尺餘以焦銅爲鏑塗毒藥於鏑鋒中人卽死不時斂藏卽膨脹沸爛須臾焦煎都盡唯骨耳其俗誓不以此藥治語人治之飲婦人月水及糞汁時有差者唯射猪犬者無他以其食糞故也焦銅者故燒器其長老唯別焦銅聲以物杵之徐聽其聲得焦毒者偏鑿取以爲箭鏑景初中蒼梧吏到京云廣州西南按交州數郡桂林晉興寧浦間人有病將死便有飛蟲大如小麥或云有甲在舍上人氣絕來食亡者雖復撲殺有斗斛而來者如風雨前後相尋續不可

斷截肌肉都盡唯餘骨在更去盡貧家無相纏者或殯殮不時皆受此弊有物力者則以衣服布帛五六重裹亡者此蟲惡梓木氣卽以板郭防左右并以作器此蟲便不敢近也入交界更無轉近郡亦有但微少耳

### 異產

漢武帝時弱水西國有人乘毛車以渡弱水來獻香者帝謂是常香非中國之所之不禮其使畱久之帝幸上林苑西使千乘輿聞并奏其香帝取之看大如燕卵三枚與棗相似帝不悅以付外庫後長安中大疫宮中皆疫病帝不舉樂西使乞見請燒所貢香一枚以辟疫氣帝不得已聽之宮中病者登日並差長安中百里咸聞香氣芳積九月餘日香猶不歇帝乃厚禮發遣錢送

一說漢制獻香不滿斤西使臨去乃發香氣如大豆者拭著宮門香氣聞長安數十里經數日乃歇

漢武帝時西海國有獻膠五兩者帝以付外庫餘膠半兩西使佩以自隨後從武帝射於甘泉宮帝弓弦斷從者欲更張弦西使乃進乞以所送餘香膠續之座上左右莫不怪西使乃以口濡膠爲水注斷弦兩頭相連注弦遂相著帝乃使力士各引其一頭終不相離西使曰可以射終日不斷帝大怪左右稱奇因名曰續弦膠

周書曰西域獻火浣布昆吾氏獻切玉刀火浣布汙則燒之則潔刀切玉如膈布漢世有獻者刀則未聞

魏文帝黃初三年武都西都尉王褒獻石膽二十斤四年獻三斤

臨邛火井一所從廣五尺深二三丈井在縣南百里昔時人以  
竹木投以取火諸葛丞相往視之後火轉盛熱盆蓋井上煮鹽  
得鹽人以家火卽滅訖今不復燃也酒泉延壽縣南山名火泉  
火出如炬

徐公曰西域使王暢說石流黃出足彌山去高昌八百里有石  
流黃數十丈從廣五六十畝有取流黃晝視孔中上狀如煙而  
高數尺夜視皆如燈光明高尺餘暢所親見之也言時氣不和  
皆往保此山





博物志卷三

異獸

漢武帝時大宛之北胡人有獻一物大如狗然聲能驚人雞犬聞之皆走名曰猛獸帝見之怪其細小及出苑中欲使虎狼食之虎見此獸卽低頭著地帝爲反觀見虎如此謂欲下頭作勢起搏殺之而此獸見虎甚喜舐唇搖尾徑往虎頭上立因搗虎面虎乃閉目低頭匍匐不敢動搗鼻下去下去之後虎尾下頭起此獸顧之虎輒閉目

後魏武帝伐冒頓經白狼山逢師子使人格之殺傷甚眾王乃自率常從軍數百擊之師子哮吼奮起左右咸驚王忽見一物從林中出如狸起上王車輓師子將至此獸便跳起在師子頭上卽伏不敢起於是遂殺之得師子一還來至洛陽三十里雞

犬皆伏無鳴吠

九真有神牛乃生谿上黑出時共鬪卽海沸黃或出鬪岸上家牛皆怖人或遮則霹靂號曰神牛

昔日南貢四象各有雌雄其一雄死於九真乃至南海百有餘日其雌塗土著身不飲食莖草長史問其所以聞之輒流涕越雋國有牛稍割取肉牛不死經日肉生如故

大宛國有汗血馬天馬種漢魏西域時有獻者

文馬赤鬣身白似若黃金名吉黃之乘復薊之露犬也能飛食虎豹

蜀山南高山上有物如獼猴長七尺能人行健走名曰猴獮一名化或曰猓獮同行道婦人有好者輒盜之以去人不得知行者或每遇其旁皆以長繩相引然故不免此得男子氣自死故

取女也取去爲室家其年少者終身不得還十年之後形皆類之意亦迷惑不復思歸有子者輒俱送還其家產子皆如人有不食養者其母輒死故無不取養也及長與人無異皆以楊爲姓故今蜀中西界多謂楊率皆玃獮化之子孫時時相有玃爪者也

小山有獸其形如鼓一足如螽澤有委蛇狀如轂長如轅見之者霸

猩猩若黃狗人面能言

### 異鳥

崇丘山有鳥一足一翼一目相得而飛名曰童見則吉良乘之壽千歲

比翼鳥一青一赤在參嶠山

有鳥如鳥文首白喙赤足曰精衛故精衛常取西山之木石以填東海

越地深山有鳥如鳩青色名曰冶鳥穿大樹作巢如升器其戶口徑數寸周飾以土壘赤白相次狀如射侯伐木見此樹即避之去或夜冥人不見鳥鳥亦知人不見已也鳴曰咄咄去明日便宜急上樹去咄咄下去明日便宜急下若使去但言笑而不已者可止伐也若有穢惡及犯其止者則虎通夕來守人不知者即害人此鳥白日見其形鳥也夜聽其鳴人也時觀樂便作人悲喜形長三尺澗中取石蟹就人火間炙之不可犯也越人謂此鳥爲越祝之祖

異蟲

南方有落頭蟲其頭能飛其種人常有所祭祀號曰蟲落故因

取之焉以其飛因晚便去以耳爲翼將曉還復著體吳時往往得此人也

江南山谿中水射工蟲甲類也長一二寸口中有弩形氣射人

影隨所著處發瘡不治則殺人今鸚鵡蟲溺人影亦隨所著處

生瘡

盧氏曰以雞腸草搗塗經日即愈周日用曰萬物皆有所相感應聞以霹靂木擊鳥影其鳥應時落地雖未嘗試以

是類知必

有之蝮蛇秋月毒盛無所蜚螫草木以泄其氣草木即死人樵採設爲草木所傷刺者亦殺人毒甚於蝮齧謂之蛇迹也

華山有蛇名肥遺六足四翼見則天下大旱

常山之蛇名率然有兩頭觸其一頭頭至觸其中則兩頭俱至孫武以喻善用兵者

異魚

南海有鰐魚狀似鼉斬其頭而乾之去齒而更生如此者三乃止

東海有牛體魚其形狀如牛剝其皮懸之潮水至則毛起潮去則毛伏

東海蛟錯魚生子子驚還入母腸尋復出

吳王江行食鱠有餘棄於中流化爲魚今魚中有名吳王鱠餘者長數寸大者如箸猶有鱠形

廣陵陳登食鱠作病華佗下之膾頭皆成蟲尾猶是鱠

東海有物狀如凝血從廣數尺方員名曰鮓魚無頭目處所內無藏眾蝦附之隨其東西人煮食之

異草木

太原晉陽以北生屏風草

37  
海上有草焉名蒔

蒔音蒔

其實食之如大麥七月稔俗名曰自然

谷或曰禹餘糧

堯時有屈佚草生於庭倭人入朝則屈而指之一名指倭草

右詹山帝女化爲詹草其葉鬱茂其華黃實如豆服者媚於人

止些山多竹長千仞鳳食其實去九疑萬八千里

江南諸山郡中大樹斷倒者經春夏生菌謂之榘食之有味而  
忽毒殺人云此物往往自有毒者或云蛇所著之楓樹生者啖  
之令人笑不得止治之飲土漿卽愈

博物志卷三終





博物志卷四

物性

九竅者胎化八竅者卵生龜鼈皆此類或卵生影伏

白鵝雄雌相視則孕或曰雄鳴上風則雌孕

兔舐毫望月而孕口中吐子舊有此說余目所未見也

大腰無雄龜鼈類也無雄與蛇通氣則孕細腰無雌蜂類也

桑蠶則取阜螽子呪而成子詩云螟蛉之子蜾蠃負之是也

蠶三化先孕而後交不交者亦產子子後爲蠶皆無眉目易傷

收採亦薄

鳥雌雄不可別翼右掩左雄左掩右雌二足而翼謂之禽四足

而毛謂之獸

鵲巢門戶背太歲得非才智也

鶴雉長尾雨雪惜其尾栖高樹杪不敢下食往往餓死魏景初中天下所說

鶴水鳥也伏卵時卵冷則不沸取礬石周繞卵以時助燥氣故方術家以鶴巢中礬石

山雞有美毛自愛其色終日映水目眩則溺死

龜三千歲遊於蓮葉巢於卷耳之上

屠龜解其肌肉唯腸連其頭而經日不死猶能齧物鳥往食之則爲所得漁者或以張鳥遇神蛇復續

蟾螬以背行快於足

周官云貉不渡汶水鸛不渡濟水魯國無鸛鵒來巢記異也

橘渡江北化爲枳今之江東甚有枳橘

百足一名馬蛭中斷成兩段各行而去

物理

凡月暈隨灰畫之隨所畫而闕

淮南子云其未詳其法

麒麟鬪而日蝕鯨魚死則彗星出嬰兒號婦乳出鬚弭絲而商弦絕

莊子曰地三年種蜀黍其後七年多蛇

積艾草三年後燒津液下流成鉛錫已試有驗

煎麻油水氣盡無煙不復沸則還冷可內手攪之得水則焰起

散卒不滅此亦試之有驗

庭州灞水以金銀鐵器盛之皆漏唯瓠葉不漏

龍肉以醢漬之則文章生

積油滿萬石則自然生火武帝泰始中武庫火積油所致

物類

燒鉛錫成胡粉猶類也

燒丹朱成水銀則不類物同類異用者

魏文帝所記諸物相似亂真者

武夫怪石似美玉 蛇床亂薜蘿 薺芫亂人參 杜衡亂

細辛 雄黃似石流黃 鰕魚相亂以有大小相異 敵休

亂門冬 百部似門冬 房葵似狼毒 鉤吻草與葑華相

似 拔楔與草薺相似 名狗脊

藥物

烏頭天雄附子一物春秋冬夏採各異也

遠志苗曰小草根曰遠志

芎藭苗曰江離根曰芎藭

菊有二種苗花如一唯味小異苦者不中食

野葛食之殺人家葛種之三年不收後旅生亦不可食

神仙傳云松柏脂入地千年化爲茯苓茯苓化爲琥珀琥珀一名江珠今泰山出茯苓而無琥珀益州永昌出琥珀而無茯苓或云燒蜂巢所作未詳此二說  
地黃藍首斷心分根菜種皆生女蘿寄生兔絲兔絲寄生木上生根不著地  
堇花朝生夕死

藥論

神農經曰上藥養命爲五石之練形六芝之延年也中藥養性合歡蠲忿萱草忘憂下藥治病謂大黃除實當歸止痛夫命之所以延性之所以利痛之所以止當其藥應以痛也違其藥失其應卽怨天尤人設鬼神矣

神農經曰藥物有大毒不可入口鼻耳目者卽殺人一曰鉤吻

盧氏曰陰也黃精不相連根苗獨生者是也二曰鴟狀如雞雞生中山三曰陰命赤色著木懸其子山海中四曰內童狀如鸞亦生海中日陰命赤色著木懸其子山海中四曰內童狀如鸞

日螭螭生海中日雄曰螭雌曰螭也

神農經曰藥種有五物一曰狼毒占斯解之二曰巴豆藿汁解之三曰黎盧湯解之四曰天雄烏頭大豆解之五曰班茅戎鹽解之毒采害小兒乳汁解先食飲二升

### 食忌

人啖豆三年則身重行止難

啖榆則眠不欲覺

啖麥稼令人力健行

飲真茶令人少眠

人常食小豆令人肥肌麤燥

食鸛麥令人骨節斷解

人食鷺肉不可入水爲蛟龍所吞

人食冬葵爲狗所齧瘡不差或致死

馬食穀則足重不能行

雁食粟則翼重不能飛

藥術

胡粉白石灰等以水和之塗鬢鬚不白塗訖著油單裏令溫煖候欲燥末燥間洗之湯則不得著晚則多折用暖湯洗訖澤塗之欲染當熟洗鬢鬚有膩不著藥臨染時亦當拭鬢燥溫之

陳葵子微火炒令爆咤散著熟地遍踴之朝種暮生遠不過經宿耳

陳葵子秋種覆蓋令經冬不死春有子也

周日用曰愚聞熟地植生茱蘭穉石流黃

節於其上以盆覆之卽時可待又以變白牡丹爲五色皆以沃其根以紫草汁則變之紫紅花汁則變紅並未試於理可焉此

出  
雅

燒馬蹄羊角成灰春夏散著溼地生羅勒  
蟹漆相合成爲神仙藥服食方云

戲術

削冰令圓舉以向日以艾於後承其影則得火

取火法如用珠取火多有說者此未試

神農本草云雞卵可作琥珀其法取伏卵段黃白渾雜者煮及  
尙軟隨意刻作物以苦酒漬數宿既堅內著粉中佳者乃亂真  
矣此世所恒用作無不成者

燒白石作白灰既訖積著地經日俱冷遇雨及水澆卽便燃煙  
焰起

五月五日埋蜻蜓頭於西向戶下埋至三日不食則化成青真



珠又云埋於正申門

蜥蜴或名蝮蛇以器養之食以朱砂體盡赤所食滿七斤治擣萬杵點女人支體終年不滅唯房室事則滅故號守宮傳云東方朔漢武帝試之有驗

取鼈挫令如芥子大擣赤莧汁和合厚以茅苞五六日中作投地中經旬變為盡成鼈也

博物志卷四終



博物志卷五

方士

魏武帝好養性法亦解方藥招引四方之術士如左元放華佗

之徒無不畢至

周日用曰曹雖好奇而心道異如何招引方術之人乎如四左元放而兼見殺者若非變化已

至滅身故有道者不合親之矣既要試術即可乎

魏王所集方士名

上黨王真

隴西封君達

甘陵甘始

魯女生

譙國華

佗字元化

東郭延年

冷壽光

唐嘗

河南卜式

張

貂

汝南賁長房

薊子訓

鮮奴辜

魏國軍吏河南趙

聖卿

陽城郗儉字孟節

廬江左慈字元放

右十六人魏文帝東阿王仲長統所說皆能斷穀不食分

形隱沒出人不由門戶左慈能變形幻人視聽厭刻鬼魅

皆此類也周禮所謂怪民王制稱挾左道者也

魏時方士甘陵甘始

廬江有左慈陽城有郗儉始能行氣導引慈曉房中之術善辟穀不食悉號二百歲人凡如此之徒武帝皆集之於魏不使遊散甘始老而少容曹子建密問其所行始言本師姓韓字世雄嘗與師於南海作金投數萬斤於海又取鯉魚一雙鯉遊行沈浮有若虛淵其無藥者已熟而食言此藥去此踰遠萬里已不可行不能得也

皇甫隆遇青牛道士姓封名君達其餘養性法即可放用大略云體欲常少勞無過虛食去肥濃節酸鹹減思慮捐喜怒除馳逐慎房室春夏泄瀉秋冬閉藏詳別篇武帝行之有效

文帝典論曰陳思王曹植辯道論云世有吾王悉招至之甘陵

有甘始廬江有左慈陽城有邈儉始能行氣儉善辟穀悉號三百歲人自王與太子及余之兄弟咸以爲調笑不全信之然嘗試邈儉辟穀百日猶與寢處行步起居自若也夫人不食七日則死而儉乃能如是左慈修房中之術可以終命然非有至情莫能行也甘始老而少容自諸術士咸共歸之王使邈孟節主領諸人

近魏明帝時河東有焦生者裸而不衣處火不焦入水不凍杜

恕爲太守親所呼見皆有實事

周日用曰焦孝然居河東一庵大雪庵倒人以爲死而視之蒸

氣於雪略無變色時或折薪惠人而已故魏書云自義皇以來一人而已

潁川陳元方韓元長時之通才者所以並信有仙者其父時所傳聞河南密縣有成公其人出行不知所至復來還語其家云我得仙因與家人辭訣而去其步漸高良久乃沒而不見至今

密縣傳其仙去二君以信有仙蓋由此也

周日用曰豈  
惟二子乎

相識新論說方士有董仲君罪繫獄待死臭自陷出既而復生  
黃帝問天老曰天地所生豈有食之令人不死者乎天老曰太  
陽之草名曰黃精餌而食之可以長生太陰之草名曰鉤吻不  
可食入口立死人信鉤吻之殺人不信黃精之益壽不亦惑乎  
周日用曰草既殺人仍無益壽者也若殺人無驗則益壽不可信矣

### 服食

左元放荒年法擇大豆麤細調勻必生熟按之令有光煙氣徹  
豆心內先不食一日以冷水頓服訖其魚肉菜果不得復經口  
渴卽飲水慎不可煖飲初小困十數日後體力壯健不復思食  
鮫法服三升爲劑亦當隨食先食多少增損之盛豐欲還者煮  
葵子及脂蘇服肉羹漸漸飲之須豆下乃可食豆未盡而以實

物腸塞則殺人矣此未試或以爲然

周日用曰一說臘塗黏餅炙餅令熱卽塗之以意星

多少卽食之如常渴卽飲冷水忌熱茶耳

孔子家語曰食水者乃耐寒而苦浮食土者無心不息食木者多而不治食石者肥澤而不老食草者善走而愚食桑者有緒而蛾食肉者勇而悍食氣者神明而壽食穀者智慧而天不食者不死而神仙傳曰維食者百病妖邪之所鍾焉西域有蒲萄酒積年不敗彼俗云可十年飲之醉彌月乃解所食逾少心開逾益所食逾多心逾塞年逾損焉

### 辨方士

漢淮南王謀反被誅亦云得道輕舉

周日用曰漢書云淮南王刑應不然乎得道輕舉非

虛事也至今維陽境內馬迹猶存且日與成公同處皆上品眞人耳既談道德肯圖叛逆之事況恒行陰旨好書藝不善弋獵淮南內書言神仙黃白之術去反事遠矣夫古今書傳多黜仙道者慮帝王公侯廢萬幾而慕其道故隱而不書唯老聃不可

掩而云曰歲後西遊流沙不知所之唐書云蜀有女道士謝自然白日上升此外歷代史籍未嘗言也

劉氏夫人被殺於雲陽而言尸解解空周日用曰史云夫人被

解不云尸解

文典論云議郎李覃學邾儉辟穀食茯苓飲水中寒洩痢始至殞命軍祭酒宏農董芬學甘始鵠視狼顧呼吸吐納爲之過差氣閉不通良久乃蘇寺人嚴峻就左慈學補導之術閻豎真無事於斯而逐聲若此

又云王仲統云甘始左元放東郭延年行容成御婦人法並爲丞相所錄間行其術亦得其驗降就道士劉景受雲母九子元方年三百歲莫知所在武帝恒御此藥亦云有驗劉德治淮南王獄得枕中鴻寶祕書及子向咸而奇之信黃白之術可成謂神仙之道可致卒亦無驗乃以羅罪也周日用曰神仙之道學之匪一朝一夕而可得



也黃白者仍須有分昇騰者應須有骨安可偶然而得效也

劉根不覺饑渴或謂能忍盈虛王仲都當盛夏之月十鑪火炙之不熱當嚴冬之時裸之而不寒桓君山以爲性耐寒暑君山以無仙道好奇者爲之前者已述焉

司馬遷云無竟以天下讓許由事揚雄亦云誇大者爲之揚雄又云無仙道桓譚亦同

博物志卷五終



博物志卷六

人名攷

昔彼高陽是生伯鯀布土取帝之息壤以填洪水

殷三仁微子箕子比干

文王四友南宮括散宜生閎夭太顛仲尼四友顏淵子貢子路子張

曹參字伯敬

蔡伯喈母袁公妹曜卿姑也

古之善射者甘蠅蠅之弟子曰飛衛

平原管輅善卜筮解鳥語

蔡邕有書萬卷漢末年載數車與王粲粲亡後相國掾魏諷謀反粲子與焉既被誅邕所與粲書悉入粲族子葉字長緒卽正

宗父正宗卽輔嗣兄也初粲與族兄凱避地荊州依劉表表有女表愛粲才欲以妻之嫌其形陋周率乃謂曰君才過人而體貌躁非女葺才凱有風貌乃妻凱生葉卽女所生

太丘長陳寔寔子鴻臚卿紀紀子司空羣羣子泰四世於漢魏二朝有重名而其德漸小減故時人爲其語曰公慙卿卿慙長

### 文籍攷

聖人制作曰經賢者著述曰傳鄭元注毛詩曰箋不解此意或云毛公嘗爲北海郡守元是此郡人故以爲敬

何休注公羊傳云何氏學又不能解者或答云休謙詞受學於師乃宣此義不出於己此言爲允

太古書今見有神農經山海經或云禹所作周易蔡邕云禮

記月令周公作

周日用曰禮記疏云第一是呂不韋春秋明呂氏所制蔡邕云周公未之詳也

謚法司馬法周公所作

余友下邳陳德龍謂余言曰靈光殿賦南郡宜城王子山所作  
子山嘗之泰山從鮑子真學算過魯國都殿而賦之還歸本州  
溺死湘水時年二十餘也

地理攷

周自后稷至於文武皆都關中號爲宗周秦爲阿房殿在長安  
西南二十里殿東西千步南北三百步上可以坐萬人庭中受  
十萬人二世爲趙高所殺於宜春宮在杜城南三里葬於旁  
周時德澤盛高大以爲宮柱名曰蒿宮

姜原嗣祠在壩城長安西南三十里

盜跖家在大陽縣西

趙鞅家在臨水縣界

始皇陵在驪山之北高數十丈周迴六七里今在陰盤縣界北陵雖高大不足以銷六丈冰背陵郭使東西流又此山名運取大石於渭北渚故歌曰運石甘泉口渭水爲不流千人唱萬人鉤金陵餘石大如塢土屋其銷功力皆如此類

唐氏曰秦氏奢侈自知葬用珍

寶多故高作陵園山麓從難發也高則難上固則難攻項羽爭衡之時發其陵未詳其至棺否

舊洛陽字作水邊各火行也忌水故去水而加佳又魏於行次爲土水得土而流土得水而柔故復佳加水變雒爲洛焉

洞庭君山帝之二女居之曰湘夫人又荊州圖經曰湘君所遊故曰君山

南荆賦江陵有臺甚大而有一柱眾木皆拱之

典禮攷

三讓一曰讓禮二曰固讓三曰終讓

漢承秦羣臣上書皆曰昧死言

王莽盜位慕古去昧死曰稽首光武因而不改

肉刑明王之制荀卿每論之至漢文帝感太倉公女之言而廢之班固著論宜復迄漢末魏初陳紀又論宜申古制孔融云不可復欲申之鍾繇王朗不同遂寢夏侯元李勝曹義丁謐建私議各有彼此多云時未可復故遂寢焉

上公備物九錫一大輅各一元牡二駟二袞冕之服赤鷩副之三軒懸之樂六佾之舞四朱戶以居五納陛以登六虎賁之士三百人七鈇鉞各一八彤弓一彤矢百旅弓十旅矢千九鉅鬯一卣珪瓚副之

樂攷

漢木喪亂無金石之樂魏武帝至漢中得杜夔舊法復設軒懸

鐘磬至於今用之始於夔也

服飾攷

漢末喪亂絕無玉佩始復作之今之玉佩受於王粲

古者男子皆絲衣有故乃素服又有冠無幘故雖凶事皆著冠也  
漢中興士人皆冠葛巾建安中魏武帝造白帟於是遂廢唯一  
學書生猶著也

器名攷

寶劍名純鉤湛盧豪曹魚腸巨闕五劍皆歐冶子所作龍泉太  
阿上市三劍皆楚王作

風胡子因吳請王將歐冶子作王將陽龍文莫邪陰漫理此二

劍吳王使王將作莫邪王將妻也

夫妻其妻  
作劍也

亦刀周之寶器也



物名攷

古駿馬有飛兔腰裏

周穆王八駿

赤驥

飛黃

白蟻

華驪

騄耳

騊駼

渠黃

盜驪

唐公有驪駒

項羽有騅

周日用曰曹公有流影而呂布有赤兔皆後來有良駿也

周穆王有犬名耗毛白

晉靈公有畜狗名葵

韓國有黑犬名盧

宋有駿犬曰離

犬四尺爲葵

張騫使西域還乃得胡桃種

徐州人謂塵土爲蓬塊吳人謂跋跌

博物志卷六終

博物志卷七

異聞

昔夏禹觀河見長人魚身出曰吾河精豈河伯也

馮夷華陰潼鄉人也得仙道化爲河伯豈道同哉仙夷乘龍虎水神乘魚龍其行恍惚萬里如室

夏桀之時爲長夜宮於深谷之中男女雜處十旬不出聽政天乃大風揚沙一夕填此宮谷又曰石室瑤臺關龍逢諫桀言曰吾之有民如天之有日日亡我則亡以爲龍逢妖言而殺之其後復於山谷下作宮及在上耆老相與諫桀又以爲妖言而殺之

夏桀之時費昌之河上見二日在東者爛爛將起在西者沈沈將滅若疾雷之聲昌問於馮夷曰何者爲殷何者爲夏馮夷曰

西夏東殷於是費昌徙族歸殷

武王伐紂至盟津渡河大風波武王操戈秉麾麾之風波立霽魯陽公與韓戰酣而日暮援戈麾之日反三舍

太公爲灌壇令武王夢婦人當道夜哭問之曰吾是東海神女嫁於西海神童今灌壇令當道廢我行我行必有大風雨而太公有德吾不敢以暴風雨過是毀君德武王至明日召太公三日三夜果有疾風暴雨從太公邑外過

晉文公出大蛇當道如拱文公反修德使吏守蛇吏夢天殺蛇曰何故當聖君道覺而視蛇則自死也

齊景公伐宋過泰山夢二人怒公謂太公之神晏子謂宋祖湯與伊尹也爲言其狀湯皙客多髮伊尹黑而短卽所夢也景公進軍不聽軍鼓毀公怒散軍伐宋

徐偃王志云徐君宮人娠而生卵以爲不祥棄之水濱獨孤母有犬名鵠蒼獵於水濱得所棄卵銜以東歸獨孤母以爲異覆煖之遂蛸成兒生時正偃故以爲名徐君宮中聞之乃更錄取長而仁智襲君徐國後鵠蒼臨死生角而九尾實黃龍也偃王又葬之徐界中今見存偃王旣襲其國仁義著聞欲舟行上國乃通溝陳蔡之間得朱弓矢以已得天瑞遂因名爲弓自稱徐偃王江淮諸侯皆伏從伏從者三十六國周王聞遣使乘駟一日至楚使伐之偃王仁不忍聞害其民爲楚所敗逃走彭城武原縣東山下百姓隨之者以萬數後遂名其山爲徐山山上立石室有神靈民人祈禱今皆見存海水西夸父與日相逐走渴飲水河謂不足北飲大澤未至渴而死棄其策杖化爲鄧林

澹臺子羽渡河齎千金之璧於河河伯欲之至陽侯波起兩蛟挾船子羽左摻壁右操劍擊蛟皆死既渡三投璧於河伯河伯躍而歸之子羽毀而去

荆軻字次非渡鮫夾船次非不奏斷其頭而風波靜除

周日用曰余嘗

行經荆將軍墓墓與羊角哀冢鄰昔安伯施云爲荆將軍所伐乃在此也其地在苑陵之源求見其墓碑將軍名軻次非字也

東阿王勇士有蕃丘訴過神淵使飲馬馬沈訴朝服拔劍二日一夜殺二蛟一龍而出雷隨擊之七日夜眇其左目

漢滕公薨求葬東都門外公卿送喪駟馬不行跼地悲鳴跑蹄下地得石有銘曰佳城鬱鬱三千年見白日吁嗟滕公居此室遂葬焉

衛靈公葬得石槨銘曰不逢箕子靈公奪我里

漢西都時南宮寢殿內有醇儒王史威長死葬銘曰明明哲士

知存知亡崇隴原壘非寧非康不封不樹作靈乘光厥銘何依  
王史威長

元始元年中謁者沛郡史岑上書訟王宏奪董賢璽綬之功  
靈帝和光元年遼西太守黃翻上言海邊有流屍露冠絳衣體  
貌完全使翻感夢云我伯夷之弟孤竹君也海水壞吾棺槨求  
見掩藏民有襁褓視皆無疾而卒

漢末關中大亂有發前漢時冢者人猶活既出平復如舊魏郭  
后愛念之錄養宮內常置左右問漢時宮中事說之了了皆有  
次序后崩哭泣過禮遂死焉

漢末發范友明冢奴猶活友明霍光女瑋說光家事廢立之際  
多與漢書相似此奴常遊走於民間無止住處今不知所在或  
云尙在余聞之於人可信而目不可見也

大司馬曹休所統中郎謝璋部曲義兵奚儂恩女年四歲病沒  
故埋葬五日復生太和三年詔令休使父母同時送女來視其  
年四月三日病死四日埋葬至八日向墟入採桑聞兒生活今  
能飲食如常

京兆都張潛客居遼東還後爲駙馬都尉關內侯表言故爲諸  
生太學時聞故太尉常山張顯爲梁相天新雨後有鳥如山鵲  
飛翔近地市人擲之稍下墮民爭取之卽爲一員石言縣府顯  
令搥破之得一金印文曰忠孝侯印顯表上之藏於官庫後議  
郎汝南樊行夷校書東觀表上言堯舜之時舊有此官今天降  
印宜可復置


孝武建元四年天雨粟孝元景寧元年南陽郡內雨穀小者如  
麥粟而青黑味苦大者如大豆赤黃味如麥下三日生根葉狀



如大豆初生時也

代城始築立板幹一旦亡西南四五十板於澤中自立結草爲外門因就營築焉故其城直周三十七里爲九門故城處爲東城

博物志卷七終



博物志卷八

史補

黃帝登仙其臣左徹者削木象黃帝帥諸侯以朝之七年不還左徹乃立顓頊左徹亦仙去也

堯之二女舜之二妃曰湘夫人舜崩二妃啼以涕揮竹竹盡斑處士東里塊貢禹亂天下事禹退作三章強者攻弱者守敵戰城郭蓋禹始也

大妣夢見商之庭產棘乃小子發取周庭梓樹樹之於闕聞梓化為松柏棧杵覺驚以告文王文王曰慎勿言冬日之陽夏日之陰不召而萬物自來天道尙左日月西移地道尙右水潦東流天不享於殷自發之未生於今年商羊在牧水潦東流天下飛鴻滿野日之出地無移照乎

武王伐殷舍於幾逢大雨焉率輿三百乘甲三千一日一夜行三百里以戰於牧野

成王冠周公使祝雍曰辭達而勿多也祝雍曰近於民遠於侯近於義嗇於時惠於財任賢使能陛下擯顯先帝光耀以奉皇天之嘉祿欽順仲壺之言曰遵並大道郊域康阜萬國之休靈始明元服推遠童稚之幼志宏積文武之就德肅懃高祖之清廟六合之內靡不蒙德歲歲與天無極仁孝昭周成王冠辭

止雨祝曰天生五穀以養人民今天雨不止用傷五穀如何如何靈而不幸殺牲以養神靈雨則不止鳴鼓攻之朱絲繩縈而脅之

請雨曰皇皇上天照臨下土集地之靈神降甘雨庶物羣生咸得其所

禮記曰孔子少孤不知其父墓母亡問於鄒曼父之母乃合葬於防防墓又崩門人後至孔子問來何遲門人實對孔子不應如是者三乃潛然流涕而止曰占不修墓蔣濟何晏夏侯元王

肅皆云無此事注記者謬時賢咸從之

周日用曰四十言無者後有何理而述之在愚

所見實未之無矣且徵在與梁紇野合而生事多隱之况我生而父已死既隱何以知之非問曼父之母安得合葬於防也

孔子東遊見二小兒辯鬪問其故一小兒曰我以日始出時去人近而日中時遠也一小兒曰以日出而遠而日中時近一小兒曰日初出時大如車蓋及日中時如盤盂此不爲遠者小而大者近乎一小兒曰日初出滄滄涼涼及其中而探湯此不爲近者熱而遠者涼乎孔子不能決謂兩小兒曰孰謂汝多知乎

亦出列子

周日用曰日當中向熱者炎氣直下也當猶火氣直上而與旁者俱炎涼可悉耳是明初出近而當中遠

矣豈聖人肯對乎

子路與子貢過鄭神社樹有烏神牽轡子路子貢說之乃止  
春秋哀公十四年春西狩獲麟公羊傳曰有以告者孔子曰孰  
爲來哉孰爲來哉虛曰以其時非應故孔子泣而感左傳曰叔  
孫氏之車子鉏商獲麟以爲不祥

燕太子丹質於秦秦王遇之無禮不得意思欲歸請於秦王王  
不聽諺言曰令烏頭白馬生角乃可丹仰而歎烏即頭白俯而  
嗟馬生角秦王不得已而遣之爲機法之橋欲陷丹丹驅馳過  
之而橋不發遁到關關門不開丹爲雞鳴於是眾雞悉鳴遂歸  
詹何以獨繭絲爲綸芒針爲鉤荆篠爲竿割粒爲餌引盈車之  
魚於百仞之淵汨流之中綸不絕鉤不申竿不撓

薛譚學謳於秦青未窮青之旨於一日遂辭歸秦青乃餞於郊  
衢撫節悲歌聲震林木響遏行雲薛譚乃謝求返終身不敢言

歸秦青顧謂其友曰昔韓娥東之齊遺糧過雍門鬻歌假食而去餘響遶梁三日不絕左右以其人弗去過逆旅凡人辱之韓娥因曼聲哀哭一里老幼喜歡抃舞弗能自禁乃厚賂而遺之故雍門人至今善歌哭效娥之遺聲也

趙襄子率徒十萬狩於中山藉芳燔林扇赫百里有人從石壁中出隨煙上下若無所之經涉者襄子以爲物徐察之乃人也問其奚道而處石奚道而入火其人曰奚物爲火其人若不知也魏文侯聞之問於子夏曰彼何人哉子夏曰以商所聞於夫子者和者同於物物無得而傷閱者遊金石之間及蹈於水火皆可也文侯曰吾子奚不爲之子夏曰刳心知智商未能也雖試語之而卽暇矣文侯曰夫子奚不爲之子夏曰夫子能而不爲文侯不悅

更羸謂魏王曰臣能射爲虛發而下鳥王曰然可於此乎曰聞有鳥從東來羸虛發而下之也

澹臺子羽子溺水死欲葬之滅明曰此命也與螻蟻何親與魚鼈何憐遂使勿葬

列傳云聶政刺韓相白虹爲之貫日要離刺慶忌彗星襲月專諸刺吳王僚鴈擊殿上

齊桓公出因與管仲故道自燉煌西涉流沙往外國沙石千餘里中無水時則有沃流處人莫能知皆乘駱駝駱駝知水脉遇其處輒停不肯行以足蹋地人於其蹋處掘之輒得水

楚熊渠子夜行射窮石以爲伏虎矢爲沒羽

漢武帝好仙道祭祀名山大澤以求神仙之道時西王母遣使乘白鹿告帝當來乃供帳九華殿以待之七月七日夜漏七刻



王母乘紫雲車而至於殿西南面東向頭上戴七種青氣鬱鬱如雲有三青鳥如鳥大使侍母旁時設九微燈帝東面西向王母索七桃大如彈丸以五枚與帝母食二枚帝食桃輒以核著膝前母曰取此核將何爲帝曰此桃甘美欲種之母笑曰此桃三千年一生實唯帝與母對坐其從者皆不得進時東方朔竊從殿南廂朱鳥牖中窺母母顧之謂帝曰此窺牖小兒嘗三來盜吾此桃帝乃大怪之由此世人謂方朔神仙也

君山有道與吳包山潛通上有美酒數斗得飲者不死漢武帝齋七日遣男女數十人至君山得酒欲飲之東方朔曰臣識此酒請視之因一飲致盡帝欲殺之朔乃曰殺朔若死此爲不驗以其有驗殺亦不死乃赦之

博物志卷八終

博物志卷九

雜說上

老子云萬民皆付西王母唯王聖人真人仙人道人之命上屬九天君耳

黃帝治天下百年而死民畏其神皐用其教百年故曰黃帝三百年上古男三十而妻女二十而嫁曾子曰弟子不學古知之矣貧者不勝其憂富者不勝其樂

昔西夏仁而去兵城廓不修武士無位唐伐之西夏亡昔者元都賢鬼神道廢人事其謀臣不用龜策是從忠臣無祿神巫用國

榆罔氏之君孤而無使曲沃進伐之以亡

昔有巢氏有臣而貴任之專國主斷已而奪之臣怒而生變有

巢以亡昔者清陽強力貴美女不治國而亡

昔有洛氏宮室無常囿池廣大人民困匱商伐之有洛以亡

神仙傳曰說上據辰尾爲宿歲星降爲東方朔傳說死後有此宿東方生無歲星

曾子曰好我者知吾美矣惡我者知吾惡矣

思士不妻而感思女不夫而孕后稷生乎臼跡伊尹生乎空桑箕子居朝鮮其後伐燕之朝鮮亡入海爲鮮國師兩妻墨色珥兩青蛇蓋勾芒也

漢興多瑞應至武帝之世特甚麟鳳數白王莽時郡國多稱瑞應歲歲相尋皆由順時之欲承旨求媚多無實應乃使人猜疑子胥伐楚燔其府庫破其九龍之鍾

著一千歲而三百萃其本以老故知吉凶著未大於本爲上吉

筮必沐浴齋潔食香每日望浴蓍必五浴之浴龜亦然明夷曰  
昔夏后夢雉飛龍而登於天而牧占四華皐陶曰吉昔夏啓夢  
徙九鼎啓果徙之

昔舜筮登天爲神牧占有黃龍神曰不吉武王伐殷而牧占蓍  
老蓍老曰吉桀筮伐唐而牧占熒惑曰不吉昔鯀筮注洪水而  
牧占大明曰不吉有初無後

蓍末大於本爲卜吉次蒿次荆皆如是龜蓍皆月望浴之  
水石之怪爲龍罔象木之怪爲躩罔兩土之怪爲獺羊火之怪  
爲宋無忌

鬪戰死亡之處其人馬血積年化爲燐燐著地及草木如露略  
不可見行人或有觸者著人體便有光拂拭便分散無數愈甚  
有細咤聲如炒豆唯靜處良久乃滅後其人忽忽如失魂經曰

乃差今人梳頭脫著衣時有隨梳解結有光者亦有咤聲

風山之首方高三百里風穴如電穴深三十里春風自此而出也何以知還風也假令東風雲反從西來洗洗而疾此不旋踵立西風矣所以然者諸風皆從上下或薄於雲雲行疾下雖有微風不能勝上上風來則反矣

春秋書鼯鼠食郊牛牛死鼠之類最小者食物當時不覺痛世傳云亦食人項肥厚皮處亦不覺或名甘鼠俗人諱此所嚙衰病之徵

鼠食巴豆三年重三十斤

博物志卷十

雜說下

婦人妊娠未滿三月著堦衣冠平旦左邊并三匝映詳影而去

勿反顧勿令人知見必生男

周日用曰知女則可依法或先是男如何余聞有定法定母年月日

與受胎時日算之遇奇則爲男遇偶則爲女知爲女後即可依法

婦人妊娠不欲令見醜惡物異類鳥獸食當避其異常味不欲

令見熊羆虎豹御及鳥射射雉食牛心白犬肉鯉魚頭席不正

不坐割不正不食聽誦詩書諷詠之音不聽淫聲不視邪色以

此產子必賢明端正壽考所謂父母胎教之法

盧氏曰子之得清味滋液則生

仁聖謂錯亂之年則生貪淫子因母氣也

故古者婦人妊娠必慎所感於善則善

惡則惡矣妊娠者不可啖兔肉又不可見兔令兒唇缺又不可

啖生薑令兒多指

異說云瞽叟夫婦兇頑而生舜叔梁紇淫夫也徵在失行也加

又野合而生仲尼焉其在有胎教也

盧氏曰夫甲及寅申生者聖以年在歲德在甲寅壬

申生者則然矣亦由先天也亦由父母氣也古者元氣清故多聖今者俗淫陰濁故無聖人也

豫章郡衣冠人有數婦暴面於道爭分銖以給其夫輿馬衣資及舉孝廉吏取富者一切皆給先者雖有數年之動婦子滿堂室猶放黜以避後人

諸遠方山郡幽僻處出密蠟人往往以桶聚蜂每年一取

遠方諸山密蠟處以木爲器中開小孔以密蠟塗器內外令遍春月蜂將生育時捕取三兩頭著器中蜂飛去尋將伴來經日漸益遂持器歸

人藉帶眠者則夢蛇

鳥銜人之髮夢飛



王爾張衡馬均皆冒重霧行一人無恙一人病一人死問其故無恙人曰我飲酒病者食死者空腹

人以冷水自漬至膝可頓啖數十枚瓜漬至腰啖轉多至頸可啖百餘枚所漬水皆作瓜氣味此事未試人中酒不解治之以湯自漬卽愈湯亦作酒氣味也

昔劉元石於中山酒家酤酒酒家與千日酒忘言其節度歸至家當醉而家人不知以爲死也權葬之酒家計千日滿乃憶元石前來酤酒醉向醒耳往視之云元石亡來三年已葬於是開棺酤始醒俗云元石飲酒一醉千日

舊說云天河與海通近世有人居海渚者年年八月有浮槎去來不失期人有奇志立飛閣於槎上多齎糧乘槎而去十餘日中猶觀星月日辰自後芒忽忽亦不覺晝夜去十餘日奄至

一處有城郭狀屋舍甚嚴遙望宮中多織婦見一丈夫牽牛渚  
次飲之牽牛人乃驚問曰何由至此此人具說來意并問此是  
何處答曰君還至蜀郡訪嚴君平則知之竟不上岸因還如期  
後至蜀問君平曰某年月日有客星犯牽牛宿計年月正是此  
人到天河時也

人有山行墮深澗者無出路饑餓欲死左右見龜蛇甚多朝暮  
引頸向東方人因伏地學之遂不饑餓殊輕便能登巖岸經數  
年後竦身舉臂遂超山澗上即得還家顏色悅懌頗更黠慧勝  
故還食菰啖滋味百餘日中復本質

天門郡有兩山峻谷而其上有從下經過者忽然踊出林表  
狀如飛仙遂絕迹年中如此甚數遂名此處爲仙谷有樂道好  
事者入此谷中洗沐以求飛仙往往得去有長意思人疑必以


妖怪乃以大石自墜牽一犬入谷中犬復飛去其人還告鄉里募數十人執杖搗山草伐木至山頂觀之遙見一物長數十丈其高隱人耳如簾箕格射刺殺之所吞人骨積此左右有成封蟒開口廣丈餘前後失人皆此蟒氣所噏上於是諸地遂安穩無患

博物志卷十終



卷一

三





博物志

CHI  
1140











